

Šta mi možemo učiniti za mir?

Izaberimo mir zajedno

Međunarodni dan mira obilježava se diljem svijeta 21.09. Rezolucijom UN-a iz 2001. godine ovaj datum određen je danom nenasilja i prekida neprijateljstava u svijetu. Međunarodni dan mira utemeljila je Opća skupština UN još 1981. u cilju obilježavanja i jačanja ideala mira među svim narodima i državama, namijenivši za njegovo obilježavanje treći utorak u septembru/rujnu. Dvadeset godina poslije novom je rezolucijom za fiksni datum obilježavanja bio proglašen 21.09. kao dan globalnog prekida neprijateljstava i nenasilja.

Zašto izgradnja mira?

Izgradnja mira je koncept koji se odnosi na vođenje širokog spektra društvenih aktivnosti sa ciljem transformacije društvenih odnosa i struktura, čime se nastoje sanirati posljedice prijašnjih sukoba i otkloniti uzroke budućih. To je stvaranje cjelovite strategije koja uključuje međusektorsku suradnju i uvezivanje trenutno nepovezanih zakonodavnih, institucionalnih i programskih okvira važnih za izgradnju mira.

Mi zagovaramo i djelujemo u pravcu unošenja promjena u postojeće strukture društva i donosimo preporuke za bolje sutra.

BiH društvo još uvijek nije spremno za suočavanje sa prošlošću, ali suočavanje sa prošlošću i dijalog ključne su teme budućeg mirovnog rada, koje prati razvijanje povjerenja među ljudima. Potrebno je nastaviti raditi na dokumentiranju ratnih zločina i procesuiranju počinioca.

Politički lideri trebaju govoriti o miru, prekinuti govor mržnje, prestati činiti sve ono što jača strah i nepovjerenje, a jednak pristup trebaju imati i vjerski lideri i institucije.

Posebnu pažnju treba obratiti na mlade koji nisu doživjeli rat i na načine kako kod njih razvijati odnos prema prošlosti i afirmirati odgovornost za mirnu budućnost.

VRIJEDNOSTI I PRINCIPI PLATFORME MIROVNOG RADA

Tolerancija

Zagovaramo stalnu toleranciju prema drugom i drugačijem, što podrazumijeva uvažavanje različitih mišljenja, stavova, navika, običaja na nivou međuljudskih odnosa, ali i šireg društvenog konteksta.

Jednakost, ravnopravnost i uključivanje

Zagovaramo uvažavanje prava i sloboda za svakog građana/ku Bosne i Hercegovine neovisno o spolu, rodu, porijeklu, etničkoj, vjerskoj, socio-ekonomskoj i bilo kojoj drugoj pripadnosti i omogućavamo slobodno djelovanje svake osobe u procesima odlučivanja na svim nivoima društvene djelatnosti.

Nenasilje

Zagovaramo nenasilnu komunikaciju u svim oblastima života kao način razrješenja konflikata i sukoba na svim nivoima.

Solidarnost i suradnja

Zagovaramo važnost povezanosti, podrške, zajedničkog i volonterskog djelovanja u svim društvenim oblastima I nivoima društvenog sistema u Bosni i Hercegovini.

Izgradnja povjerenja i pomirenje

Zagovaramo ponovnu izgradnju povjerenja uništenog ratnim sukobima i nasiljem u kojem su stradale osobe i njihova imovina neovisno o spolu, rodu, porijeklu, etničkoj, vjerskoj, socio-ekonomskoj i bilo kojoj drugoj pripadnosti.

Ljudska prava i slobode

Zagovaramo poštivanje svih ljudskih prava i sloboda definiranim i priznatim u domaćim i međunarodnim zakonima, konvencijama, deklaracijama i rezolucijama.

Odgovornost i Pravda

Zagovaramo odgovornost i pravdu za sve građane/ke u Bosni i Hercegovini. Ističemo značaj poštivanja međunarodnog humanitarnog prava, procesuiranje počinitelja ratnih zločina pred međunarodnim i domaćim sudovima.

Aktivizam

Zagovaramo i potičemo sve građane/ke u Bosni i Hercegovini na osobno ili zajedničko sudjelovanje u detektiranju i djelovanju na društvene probleme. Posebno naglašavamo uključivanje mladih u procese izgradnje mira i boljeg društva.